



**NATIONAL DAY
13th SEPTEMBER**



YUMI WANPELA KANTRI WANPELA PIPEL

Yumi no lusim ting: Septemba 13 em i Nesenel De.As tingting bilong dispela yia em hia: BUNG WANTAIM. Yumi ol manmeri bilong Papua New Guinea, yumi wan pipel, yumi wan kantri.Long dispela pes yumi lukim sampela piksa i soim kain kain man i BUNG WANTAIM. Yumi bihainim dispela pasin. Maski kala,maski tok ples,maski lotu, yumi pasim han, yumi BUNG WANTAIM.



PAS KAM LONG EDITA

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prininem nem bilong yu tru, oreit yu raitim arapela nem bilong yu tu.

Laik Skul O Marit ?

Dia Edita.- Ol yangpela man na yangpela meri ol i stap yet long ol haiskul long Teritori ol i no save tingting stret long ol skul wok bilong ol.

Long taim ol i liklik yet ol i tingting pinis long marit. Ol i no tingting long wok bilong bekim ol bikpela mani bilong papamama bilong ol.

Na mi ting bai i no gat planti gutpela lida long Teritori long taim bihain. Yumi laikim kwik selp gavman na ol yangpela boi na meri ol i les long skul na sampela ol i ranawe i go long ol ples bilong ol.

Tony Pinia
Los Negros, Manus

No Laik Sem Tumas

Dia Edita.-Plantim taim long ol malolo bilong mipela ol lain bilong haiskul, na mi save lukim ol boi na gel long ples bilong ol. Taim papamama na pipel bilong ol i mekim singsing ol i save no laik na sem tumas long joinim ol papamama na pipel bilong ol long singsing. Tasol ol i save dres ap tru na sanap arere na lukluk olsem wanpela waitskin i nupela long dispela ples.

Mi ting, long mipela ol lain bilong ol bikpela skul, em i no stretpela pasin. Mipela i lainim, save long rit, rait na spik inglis, mekim na bihainim sampela samting bilong ol wait-

man olsem ol yet. Na mipela i ting mipela i antap moa, winim na laik rabisim ol gutpela pasin na we bilong ol papamama pipel bilong yumi.

John Winyawi Woichom
Aitape

Laik Bilong Mi

Dia Edita.- Mi bekim pas bilong Misis Ga Tuman. Tru yu bin tok olsem "Laik bilong mi" Tasol wantok yu no bin klia tumas long tok bilong yu. I tru laik bilong wan wan laka? Tasol yumi no maritim waitman long planti mani bilong ol.

Yu ting netif man i no gat mani? Nating mobeta yu tok yu laikim hapkas pikinini tasol na yu giaman long mani. Wantok mi singelmeri tu ia. Tasol mi no gat laik long maritim waitman i gat planti mani.

Mary Kiv
Rabaul

Maritim Waitman

Dia Edita.- Mi bekim pas bilong Misis Ga Tuman bilong Minj. Yes, Ga Tuman ating yu gat kran-ki tingting long het bilong yu. Maritim ol mastata i no samting bilong kantri i go het. Sapos yumi ol man na meri i wok wantaim, ating bambai kantri bilong yumi i go het. Yu ting wanem, yu inap winim mani long pamuk na maritim ol mastata?

M.B. Raphael
Is Sepik

No Daunim Lida

Dia Edita.- Francis D. Keko i tok long Tei Abal em i fel long mekim wok bilong em. Sapos yu ting olsem, bilong wanem yu no askim em i kam wok olsem hausboi bilong yu? Francis, yu save pinis man olsem Tei Abal bai i kamap lida bilong dispela kantri yumitupela i no save. Francis larim nem bilong em i go antap pastaim. Tei Abal em i man bilong toktok planti na planti manmeri ol i laikim em tumas. Long wanem: Em i bihainim laik bilong planti pipel bilong hailans.

Phanuel Dee
Madang

Paulim Tok

Dia Edita.- Watpo ol maritim ol i save lusim ol meri bilong ol na go long arapela meri? Man em i maritim namba wan meri bilong em na ol i gat ol pikinini bilong ol, bihain papa bilong ol em i lusim ol pikinini wantaim mama bilong ol. Na papa bilong ol em i go maritim narapela yangpela meri na em i no tingting bek long ol pikinini bilong namba wan meri bilong em.

Olsem wanem em i stret o nogat? Mi ting em i stret. Watpo? Bikoš ol i brukim lo bilong God. God i tok olsem. Maritim wanpela meri na yu i stap wantaim em inap long taim wanpela bilong yutupela indai. Man o meri indai em nau man em i ken marit bek na meri tu olsem. Mi no tok long ol Bougainville

tasol, Nogat. Long olgeta manmeri bilong Papua New Guinea.

Lucy B.K. Linda
Bougainville

Baim O Nogat ?

Dia Edita.- Yes olsem wanem sapos ol tisa i laik kirapim wanpela wok long stesin o long skul na tisa yet wantaim ol sumatin i go long kisim ol samting long bus.

Ol pipel i lukim olsem, ol i go tokim kaunsil wantaim ol i kam na askim strong tru long tisa long baim ol samting bilong bus. Na ol tisa i baim dispela ol samting. Mi pilim i no stret olsem mi autim. Olsem haus o wanem samting ol tisa i bin kirapim long wanem hap ol i bin tis long en, ol i no inap kisim i go long ples bilong ol.

Paul M. Oupi
Tau

Misin Bringim Gutnius

Dia Edita.- Mi harim long ples bilong mi, ol man i tok long ol Katolik Misin olsem. Pastaim ol Katolik Misin i kam na ol i no givim gutpela lo long yumi. Plis ol wantok, ol Misin i no kam long givim gutpela lo long yumi, nogat ol i kam long skulim yumi long gutpela nius bilong bikpela bilong yumi, Jisas Kraist.

Moses Sap,
Madang

KISIM PRAIS NATING

Dia Pren,

Yu no moa kisim niuspepa WANTOK tasol mipela i no bin lusim tingting long yu. WANTOK i go i go yet, na mipela i hop yu laik traिम wantaim moa.

Nau mipela i gat wanpela prais. Sapos yu baim WANTOK inap long wanpela yia (\$ 4.00) bai mipela i salim kwiktaim wanpela gutpela PRAIS long yu.

Yu man bilong New Guinea, yu mas amamas long olgeta samting bilong New Guinea stret. Dispela niuspepa WANTOK em i bilong yumi stret. Em wanpela tasol inap autim ol tingting bilong ol pipel bilong New Guinea. Long dispela pepa yumi inap tokaut na ol waitman i no inap ritim. Taim bilong ileksen i laik kamap nau. Mipela bai skulim yu long olgeta kain politikal pati tu....i no long wanpela tasol. Orait, yu laik amamas wantaim planti arapela man, yu kisim gen WANTOK inap long wan yia.

Yu salim \$4.00 (foa dola) i kam na bai dispela prais tu i kam long yu. Bai yu amamas tru long en. Bai i no gat wanpela narapela man long hap bilong yu i gat wanpela.... Yu wet, bai yu lukim em i tru.... bai yu gat namba...yu wanpela. Bai yu hepi tru....

Yu katim dispela hap pepa na salim i kam bek wantaim \$4.00.)
=====

Dia WANTOK :

MI LAIKIM PRAIS I KAM NATING LONG MI.


Em hia \$4.00 (foa dola) bilong kisim WANTOK inap wan yia olgeta.

Nem bilong mi:

Adres bilong mi

.....
.....

(WANTOK PUBLICATIONS INC.
P.O. BOX 298
WEWAK



Maski Baim

Dia Edita.- Long hap bilong yumi, yumi i save baim meri. Prais bilong papamama bilong meri na lain bilong meri. Watpo? Nating dispela i no stret. Yumi mekim tupela i wok hat bihain. Tupela i no inap kirapim bisnis long ples. Tupela i tingting long bekim olgeta samting taim meri i kam long man. Dispela pasin em i bilong tumbuna o bilong bipo. Nau yumi no lusim yumi holim yet. Mobeta yumi mas kisim nupela tingting long narapela kantri. Ol narapela kantri i no save baim meri.

Joseph Gambrame Heny
Nu Briten

Meri Rait

Dia Edita.-Nau mi laik bekim askim bilong sampela retskin. Mi bin harim i no longtaim i go pinis long Radio Bougainville dispela man i bin askim olsem. Watpo ol gel bilong Bougainville i no save laik maritim ol retskin?

Yes brata mi tu mi wanpela meri bilong Bougainville, na mi laik bekim dispela askim bilong yu.

Mipela ol gel bilong Bougainville i save pinis long kain bilong yupela retskin. Sampela long yupela i bin maritim pinis long ples, na sapos yupela i kam hia taim yupela i lukim ol gel hia, hambak bilong yupela i moa moa yet.

Bihain gen long taim bilong yupela long go bek long ol hap ples bilong yupela, givim pikinini tasol na lusim long mama.

Mobeta yupela i ken maritim gut tasol long ples bilong yupela. Na sapos yu laikim wanpela

gel long mipela, maski yu maritim o singelboi yu ken i stap isi tasol. Yu husat i laik pilai long ol Bougainville gel? Bai mi amamas tasol long husat boi o gel bai i bekim leta bilong mi.

Henrietta Hary Nab,
Bougainville.

Yunifom Bilong Ol Yet

Dia Edita.- Mi lukim ol plisman, ol soldia, ol doktaboi na ol nes i gat yunifom bilong ol yet. Na olsem wanem long ol tisa na ol draiva na ol kamdaman. Gavman i no laik mekim sampela yunifom long ol dispela kain man. Em i olsem bambai yu ken save olsem ol dispela man i gat blupela samting em ol plisman ol man i gat arapela kala em ol dispela kain man.

Bikos taim i go raun long taun bai yumi ken save olsem em dispela man o meri i tisa. Olsem na mi gat liklik wari yet, olsem na mi raitim dispela pas i kam long Wantok.

Anthony. J.Kokotin
Aresili

Paulim Tok

Dia Edita.- Mi lukim planti bisnis ka i ran long olgeta viles hia long Isten Hailans long baim kopi bilong ol man bilong ples. Na ol draiva na ol boskru i save paulim ol man long baim kopi long 10¢ na 16¢ tasol.

Narapela poin mi save lukim ol i save tok, prais bilong kopi i go daun. Tasol ol kampani i no mekim dispela kain tok. Ol boskru na draiva ol yet i save tok olsem. Na ol i save paulim ol man bilong ples na i no

stret.

Bilong wanem ol i save mekim olsem na paulim ol man bilong ples? Bilong wanem gavman i tok strong long ol man bilong ples mas ranim moa bisnis? Ol tok olsem na ol man bilong ples ol i hatwok tru na planim kopi na ol arapela bisnis.

K. James Kangeto
Isten Hailans

Wokman Bilong Misin

Dia Edita.- Plis mi laik askim yupela. Olsem wanem long mipela wokman bilong misin. Taim nupela yet holim wok i go i go na lapun na bikpela sik samting, na bos bilong wok i tok, maski i go i stap long as ples bilong em. Em i gutpela, tasol husat bai i helpim em long samting olsem mani?

Mi lukim wanpela pasin em i gutpela. Wokman bilong gavman em i pinis wok o i go lip em i gat pe tu. Kain olsem ol plis, ol i go stap nating, tasol long mun ol i save kisim pe. Tasol olsem wanem long ol wokman bilong misin? Bai i gat lip pe tu o nogat?

K. Umat Jim
Siassi

No Grisim Poroman

Dia Edita.- Mi laik givim tok tenkyu long tupela brata hia: Mich. U. Serero bilong Madang na Anthony Klangu bilong Banz.

Long leta bilong Mich, i rait long ol narapela misin i no ken grisim ol pipel long narapela misin.

Sori ating sampela bilong yumi i save long kamap long ol kain kain

misin nau i kamap long yumi. Risen bilong ol long bruk na statim lotu bilong ol yet i no gutpela tumas.

Sapos yu wanem man yu stap long lotu bilong yu mekim save long lotu bilong yu yet. No ken traime long grisim narapela poroman bilong yu long kain bilip long lotu bilong yu.

Long leta bilong narapela brata Anthony dispela tok bilong yu i tru tumas. Mi laik askim gavman wantaim ol memba long Haus Asembli. I gat wanpela lo olsem i hait tasol i stap o nogat? Sapos i gat wanpela lo i stap, orait mobeta gavman i mas autim toksave long en, bambai yumi olgeta i mas save.

Nogut mi go long kalabus long meri waitskin.

D.CA. Robin
Kandrian

No Rait Long Mani

Dia Edita.- Sampela ol skul man meri na ol man i save rit na rait, ol i save raitim ol nem bilong ol long pepa mani. Mi ting dispela pasin i no stret long raitim ol nem long mani.

Sapos yupela laik raitim ol nem bilong yupela, orait yupela ken raitim long ol ring bilong yupela. Ol papa tumbuna bilong yupela save wokim mani tu?

Hia long wanpela tu dola not mi painim ol i raitim wanpela nem olsem, Margaret K. Plis tru Margaret mi ting olsem hat o bel bilong yu i swit tumas long raitim nem bilong yu.

Joe H. Undaudrey
Wewak

Long 1967 inap nau ol man long Niugini i traime kamapim 21 politikal parti.

INSAIT LONG OL POLITIK

(I KAM LONG NEW GUINEA NEWS SERVICE)

Bikpela Krai Long Mani

Long Tunde, 17 Ogas, ol saveman bilong New Guinea i bin putim gut yau long redio bilong ol. Ol i wetim toktok bilong namba wan kuskus bilong Australia, Mista Snedden. Long dispela nait em i autim baset bilong Australia bilong dispela yia.

Baset em i olsem ol aidia bilong gavman bilong Australia long ol pasin bilong mekim kamap mani long dispela yia, na long ol wok em i laik mekim long dispela mani. Papua New Guinea tu i gat baset. Na baset bilong yumi i hangkamap long baset bilong Australia. Long neks miting bilong Haus Asembli bai ol i autim tok bilong baset bilong yumi. Na bai i gat toktok na i gat wari tu.

Inap nau Australia i bin givim nating \$1,400,000,000 (moa olsem wan tausen milion dola) long Papua New Guinea. Em i kirapim dispela pasin long yia 1884. I bigin long givim mani long Papua tasol, bikos Papua tasol i teritori tru bilong Australia. Long yia 1946 inap nau Papua na New Guinea tupela i bung wantaim insait long gavman, olsem nau tupela wantaim i kisim mani. Tupela i olsem wan samting long ai bilong gavman bilong Australia. Na dispela gavman tu i laik bai tupela i kisim independens wantaim olsem wanpela kantri.

WATPO MANI I GO DAUN

Olgeta yia Australia i givim moa na moa mani bilong helpim Papua New Guinea. Las yia dispela mani i go inap long \$33,000,000 (tripela ten

tri milion dola). Long dispela yia ol i daunim liklik inap long \$30,000,000. Bilong wanem? Ol i no laikim Papua New Guinea? Nogat. Ol i bihainim tasol tingting bilong Mista Gorton. Taim em i kam lukluk raun long New Guinea em i tok: Papua New Guinea i no olsem pikinini moa. Tupela i bikpela pinis. Orait, tupela yet i mas skul long painim moa moa mani bilong tupela yet. Em i pasin bilong bikpela man - em yet i go painim wan siling bilong em. Em i no pulim mani long Papa.

Namba tu ministerial memba bilong bosim mani, Mista Oala Oala Rarua, i tok em i hepi tru long ol mani gavman bilong Australia i bin givim long gavman bilong Papua New Guinea. Tasol em i tok tu: baset bilong Papua New Guinea long

dispela yia bai i hevi long yumi liklik. Em i min wanem? Em i min Papua New Guinea i mas painim moa mani insait long kantri bilong en, o em i mas kisim dinau mani long sampela arapela kantri.

KISIM MANI WE ?

Wanpela pasin bilong painim mani em i pasin bilong takisim olgeta manmeri i save winim mani long wok bilong ol. I olsem: olgeta manmeri bilong Papua New Guinea stret, i mas givim 2¢ long olgeta wan dola ol i winim. Olgeta waitman i mas takis long 10¢ long wanpela wanpela dola ol i winim.

Sapos wanpela waitman i winim \$100 long wanpela wik, em i mas givim \$10 long gavman long dispela wik. Sapos wanpela Papuan o New Guinean i winim \$100, em i mas givim \$2 tasol long gavman. Em i samting bilong gavman, em i ken

apim takis bilong ol lokal pipel tu. Nau em i daun liklik.

O yes, i gat planti pipel liklik i ting em i no stret ol Papuan na New Guinean i mas takis long ol mani ol i save winim. Ol i tok em i hat tumas long ol, em i hevi tumas. Tru ah? Na bihain long independens husat bai i tromoim takis? Ol rabisman?

SAMPELA NUPELA PASIN

Bai gavman bilong yumi inap kamapim planti arakain pasin bilong painim mani. Ol i ken putim takis long ol bikpela kampani, long bensing, long ol kago i kam insait long kantri, long bia na wiski, long sigaret. Em hia i pasin bilong planti arapela kantri. Yumi mas bihainim pasin bilong ol. Ol i save pinis.

Yumi ritim dispela stori pinis, nau yumi ken redi long toktok i laik kamap long Haus Asembli. Man i laikim kantri bilong em, em i mas save long wok bilong gavman bilong em. Em i saveman tru.

BASET BILONG TUPELA YIA:

Long yia i go pinis (1970-1971) baset i luk olsem: (Mipela i tok long tripela hap tasol.)	
Grant-in-aid (presen nating)	\$33,000,000
Mani bilong mekim go het kantri	\$37,750,000
Pe bilong ol waitman i wok insait long gavman	\$29,000,000

Long dispela yia (1971-1972) bai i olsem:	
Grant-in-aid (presen nating)	\$30,000,000
Mani bilong mekim go het kantri.....	\$40,000,000
Pe bilong ol waitman i wok insait long gavman	\$36,000,000

Yumi lukim gut: ol presen nating i go daun. Ol arapela samting i go antap. Em i min: Australia i laik Papua New Guinea i mas skul long helpim em yet. Tupela i mas kirapim ol kain kain pasin bilong painim mani.



LONG NEKS
WANTOK
BASET
BILONG
PAPUA NEW GUINEA

SWIT MOA!



Dispela marasin bilong klinim tis, ol i kolim long "COLGATE". Smel bilong em i swit moa yet. COLGATE i nap long rausim ol liklik pipia bilong kaikai i pas long tis bilong yu. I klinim tu retpela pipia bilong buai long tis.

Sopos yu usim COLGATE bilong klinim tis bilong yu long olgeta dei, bai tis bilong yu i stap klin oltaim.

Yu nap painim dispela marasin COLGATE bilong klinim tis long planti stua long hap yu stap. Em i gutpela marasin tru bilong lukautim oltaim tis bilong yu.

Sopos yu go long stua yu askim long COLGATE marasin bilong klinim tis.

Papua New Guinea News

Ol Lotu i Bung

Planti ol kain kain pilai resis bai i kamap long Is na Wes Sepik Distrik long Nesenel De. Long Wewak lotu bilong olgeta misin wantaim bai i go pastaim tru. Na long dispela taim yet bai ol i haisapim plak bilong Papua New Guinea namba wan taim tru. Bihain bai ol i mekim ol kain kain resis na tu bai ol ami ol i mekim mas bilong ol. Long nait bai ol ami ol i kamap gen wantaim ben bilong ol na pilaim sampela gutpela musik na bai i gat singsing tu.

Long Aitape ol kain kain pilai resis bai i stat long namba 10 de bilong Septemba, na i go inap long namba 13 de. Long statim ol resis, bai ol i pilai basketbal na ragbi. Bai ol i gat kain kain resis bilong ran, paitim gita, na

kwaia singsing. Bihain bai i gat wampela resis bilong ol singsing tumbuna. Wanem ples i kamap namba wan, bai i kisim \$70 dola.



Nupela Pasin

Long neks yia bai i gat nupela pasin bilong makim wanem ol sumatin long standet 6 bai go long haiskul. Boi o meri i no mas winim eksamine-sen tasol. Em i liklik nating. Em i mas gutpela boi o gutpela meri tru.

Long bigin bilong neks yia bai ol i tokim wampela wampela skul em i ken putim hamas sumatin long fom wan long yia bihain. Orait, nau olgeta tisa bilong skul bai skelim pasin bilong ol sumatin long standet 6, na ol yet bai i tok ol i laikim husat i go het long fom wan. Eksamine-sen i helpim tingting bilong ol tasol.

Wampela Kain Resis

Long olgeta wampela wampela yia wampela kampani long Nu Ailan ol i kolim New Guinea Kampani i save givim sil(shield) long wampela viles i save klin olgeta taim. Em i olsem wampela kain resis.

Ol viles hia i stap namel long Kavieng na Namatanai.

Bilong kisim gutpela nem, viles i mas stap klin, ol pipel i mas rausim ol rabis, na ol i mas lukautim gut ol pik na kakaruk.

Ol i mas makim gut rot i go long viles na mekim planti man i laik kam lukim.

Nem bilong viles i win bai ol i prinim antap long sil. Olsem long sampela yia bihain olgeta man i ken lukim wanem viles i winim dispela resis.



Ol Lijin i Gat Pesto

Long dispela yia long de namba 8 bilong Septemba wampela lain kato-lik ol i kolim Lijin bilong Maria i gat pesto long olgeta hap bilong graun. Lijin hia em i olsem ami bilong olkain manmeri i bung na wok long helpim bilip na sindaun na beten bilong olgeta man. Ol i no kisim pe.

Wampela man bilong kantri Airlan (Ireland), nem bilong em Frank Duff, i kirapim dispela lain helpman bilong lotu long yia 1921 long ples ol i kolim Dublin. Nau ol Lijin bilong Maria i stap long olgeta

hap bilong graun na namba bilong ol i go inap wan milion.

Lijin i stat long Rabaul long yia 1954. Bihain em i kamap long planti hap bilong Wewak na Rabaul na Madang na Goroka na Bougainville na Papua. Moa olsem wan tausen manmeri bilong Papua New Guinea i insait long dispela lain.




Mista Emanuel i Dai

Long Rabaul 7-pela Tolai i kamap long kot bikos ol plisman i ting ol i bin kilim i dai namba wan kiap, Mista E.J. Emanuel. Em ol i bin mekim long namba 19 de bilong dispela mun klostu long Kabaira plantesin, samting olsem 22 mail longwe long Rabaul.

Dispela bagarap o trabel i bin kamap long taim Mista Emanuel wantaim wampela lain plisman ol i go long Kabaira plantesin long toktok wantaim ol pipel long graun. Bihain Mista Emanuel em i go limlimbur long bus wantaim wampela Tolai na em i no kam bek. Orait nau ol plisman i kirap nogut na ol i wok long painim Mista Emanuel. Bihain ol i bin painim em i slip indai pinis long wampela rot. Ol plis i bin painim tu wampela bainat bilong ol Japan i stap klostu. Samting olsem 120 plisman olgeta ol i go long painim dispela lain man i kilim pinis Mista Emanuel.


Moa long 8,000 pipel bilong dispela hap ol i bin kamap long lukim bo-di bilong Mista E.J. Emanuel.

(Lukim pes 10 long toktok bilong namba wan gavman).



Em hia nupela bris bilong ol bikpela sip long Wewak. Mista Michael Somare bilong Haus Asembli i bin opim long mun i go pinis. Longpela bilong bris inap long 241 fit na braitpela bilong em inap 40 fit.

OL MINISTERIAL MEMBA BILONG YUMI



Mr. Tei Abal
Ministerial Memba bilong
Wok Didiman
(Wabag Open)



Mr. O. I. Ashton
Ministerial Memba bilong
ol Pablik Wok na Main
(Nu Briten Rijonal)



Mr. Matthias Toliman
Ministerial Memba bilong
Edukesen
(Gazelle Open)




Mr. Sinake Giregire
Ministerial Memba bilong
Pos na Wallis
(Daulo Open)



Mr. Angmai Bilas
Ministerial Memba bilong
Tret na Indastri
(Mabusu Open)



Mr. Tore Lokoloko
Ministerial Memba bilong
Helt
(Kerema Open)



Mr. Toua Kapena
Ministerial Memba bilong
Leba
(Hiri Open)



Mr. Joseph Lue
Namba Tu Ministerial
Memba bilong Transpot
(Bougainville Rijonal)



Mr. Oala Oala-Rarua
Namba Tu Ministerial
Memba bilong Tresari
(Sentral Rijonal)



Mr. Wesani Iwoksim
Namba Tu Ministerial
Memba bilong Sosal
Developmen
(Apa Sepik Open)



Mr. Meck Singiliong
Namba Tu Ministerial
Memba bilong ol Kalabus
(Finschhafen Open)



Mr. Donatus Mola
Namba Tu Ministerial
Memba bilong Dipatmen
Nius na Toksave
(Bougainville Not Open)



Mr. Andagari Wabiria
Namba Tu Ministerial
Memba bilong ol Graun
(Koroba Open)



Mr. Siwi Kurondo
Namba Tu Ministerial
Memba bilong ol Bus
(Kerowagi Open)



Mr. Kaibelt Diria
Namba Tu Ministerial
Memba bilong Lokal
Gavman
(Waghi Open)



Mr. Lepani Watson
Namba Tu Ministerial
Memba bilong ol Bisnis
(Kula Open)

YUMI

WANPELA

KAN

NESENEL DE 13 SEPTEMBER


Long dispela yia Nesenel De (National Day) i kamap long de namba 13 bilong Septemba. Em i wanpela Mande. Tasol long wik i go pas planti sumatin bilong Papua New Guinea bai mekim kain kain pesto bilong redim tingting bilong ol manmeri long dispela Nesenel De.

Bipo dispela pestode i gat kain kain nem na kain kain mining. Em i kamap namba wan taim long de namba 4 bilong Septemba long yia 1888, bilong makim de ol Englan i kirap bosim Papua. Bihain gen em i makim de namba 12 bilong Septemba 1914. Long dispela de ami bilong ol Australia i winim ol Jerman i stap long Rabaul. Namba tri taim em i makim wanpela pesto bilong Rabaul gen. Long de namba 20 bilong Septemba 1945 ol Australia i kisim bek Rabaul long han bilong ol Japan.

Tasol ol dispela i samting bilong ol waitman. Na long yia 1968 ol Papuan na New Guinean i tok ol i laik kirapim pesto bilong helpim tingting bilong ol yet. Ol i laik bai yumi gat wanpela de yumi kolim Papua na New Guinea De. Na long dispela de yumi

strongim dispela tingting: olgeta man bilong dispela kantri i mas bung wantaim. Olsem long yia 1969 Eksekutiv Kaunsil bilong Namba Wan Gavman i makim dispela pesto long mun Septemba olsem Nesenel De i olsem de bilong yumi olgeta, de bilong olgeta manmeri bilong olgeta hap bilong Papua New Guinea.

Long dispela yia wanpela komiti long Port Moresby i stat long mekim redi olkain pesto na singsing samting bilong makim dispela de long olgeta hap bilong kantri. Mista Percy Chatterton, memba bilong Port Moresby stret, em yet i siaman bilong dispela komiti. Na ol yet i orait long strongim tingting bilong olgeta man long BUNG WANTAIM long dispela yia na dispela pesto.



Redim Olkain Resis

Long olgeta hap bilong kantri ol man i redi long Nesenel De. Em hia tok i kam long sampela ples.

Milne Bay

Ol brotkas ofisa bilong Redio Milne Bay i raun nabaut katim daun olkain singsing long teprikota bilong ol. Bai long Nesenel De i gat resis long ol dispela singsing. Man i win bai ol i baim rot bilong em i go long Port Moresby.

Morobe

Wanpela helikopta bai i soim ol man long pasin bilong kam helpim ol soldia i bagarap long taim na ples bilong pait. Ol soldia bilong Igam Bareks bai insait long dispela so. Boi skaut na Gel Gaid na ben bilong ol ami na ol plisman bai i mas. Ol man tu bai i soim olkain kaving na bilas bilong ol tumbuna.

Chimbu

Hia dispela pesto bai i begin long maket, na ol man bai i mas i go long ples pilai. Hia bai i gat sampela lotu bilong olgeta lain misin. Bai wanpela bikpela man i putim klos bikong ol tumbuna na i planim wanpela tri bilong makim dispela de. Bihain bai i gat olkain pilai na singsing. Bai sampela tim i resis long pilai kikbal, na sampela stringben tu i resis long pilai musik. Bihain tudak i kamap pinis bai i gat piksa.

Kavieng

Wanpela lain man ol i kolim Nicossa ol i redim olkain spot, na pilai, na so, na singsing bai i go inap long tripela de bilong makim dispela pesto.

Bai ol man i resis long kanu, long wilwil, long boksen, long kikbal, long ragbi, long swim. Bai i gat resis bilong ol stringben na long olkain bilas na kaving bilong soim ol stori bilong ol tumbuna. Planti prais i redi pinis, bai ol man i ken winim.


Bai ol i mas tu: ol yangpela man na meri, ol kain kain misin, ol soldia, ol wilwil na ka i gat bilas.

Karkar Ailan

Long hap bilong Madang olgeta kain na lain pipel i stap insait long taun bai insait long sampela so na sampela pilai. Olgeta man bipo i stap long ami bai i mas. Ol samting bai i begin long 11 klok moningtaim na i go inap tudak.

Bougainville

Long Wakunai bai ol i putim wanpela bikpela so didiman. Em i namba wan taim ol i mekim olsem long Bougainville. Pesto bai begin olsem: wanpela longpela lain naispela bulmakau na ka i gat bilas bai i wokabaut i kam. Dipatmen bilong Didiman bai i soim tu wanpela bulmakau man, prais bilong em inap \$3,000 (tri tausen dola).



AL DAY
TEMBER

YUMI SINDAUN TOKTOK

(Dispela em i toktok namba wan gavman, Mista Johnson, i bin mekim taim em i kisim nius bilong indai bilong kiap bilong Rabaul)

"Tude wanpela gutpela strongpela man indai pinis. Mista Jack Emanuel i bin mekim gutpela wok tru long Papua New Guinea inap long 25 yia olgeta. Nau em i no moa stap. Em indai pinis bikos em i bilip tru na hop tru long ol pipel bilong New Guinea.

"Mi save i gat planti manmeri bilong New Guinea i sem tru long harim olsem wanem ol man i kilim indai dispela gutpela man. Maski long as bilong trabel. Maski em i samting bilong nau o samting bilong bipo. Maski. Nau yumi no ken tingting moa long dispela samting. Tasol nau em i taim bilong yumi olgeta i mas tingting planti na rausim dispela pasin bilong stretim ol trabel long pait tasol. Pait i no save stretim wanpela samting; em i kirapim narapela pait tasol. Pait i pinisim man, i no stretim em.

"Nogat. Nau em i taim bilong stretim ol trabel olsem bikpela man tru: Yumi sindaun toktok na pait long toktok tasol.

"Mi hop ol lida na hetman bilong hap bilong Rabaul i kisim save pinis na ol i wantingting nau wantaim mi ...bai olgeta man i ken sindaun gut na i stap bel isi.

"Yumi olgeta i belpas na bel hevi tru long dispela nius bilong indai bilong Mista Emanuel. Wanpela mama i lusim man bilong em. Sampela pikinini i lusim papa bilong ol. Papua New Guinea i lusim wanpela nambawan man tru. Yumi olgeta i lusim wanpela man, tru tru."

(Wantok i skruim tok i go:)

WANTOK i wari wantaim ol pipel bilong Papua New Guinea long indai bilong Mista Emanuel. Em i namba wan taim long stori bilong dispela kantri wanpela namba wan kiap i lusim laip bilong em long han bilong ol pipel bilong em yet.

Mista Emanuel i lus pinis. Tasol nogut eksampel bilong em i lus nating. Em i man bilong sindaun toktok wantaim ol man i gat trabel, i gat wari. Em i no man bilong pait. Nogat. Em i save pinis, pait em i no save pinisim wanpela samting.

Sapos yumi bihainim tingting na pasin bilong em, bai dispela kantri i ken kisim namba long ai bilong ol arapela kantri. Bai ol arapela kantri i laik helpim yumi. Na bai yumi no pret long kisim independens.

Nesene! De em i gutpela taim bilong soim ol dispela samting long ol arapela kantri. Bai ol i ken lukim yumi mekim olgeta samting wantaim: wok na pilai na resis na singsing na lotu. Bai ol i hepi.



Em hia ol man bilong Ailan Tumleo i wet long nambis bilong welkom long bisop bilong Aitape. Em i kam mekim lotu long onaim namba wan misinari i putim fut bilong em long dispela ailan long de namba 24 bilong Ogas, long yia 1896. Tasol namba wan taim ol man i lukim misinari na ol i ranawe i go.



Dispela em i wanpela pilai ol man long hap bilong Madang i bin mekim bilong tingim namba wan taim ol misinari katolik i kamap long 1896.



Long Alexishafen samting olsem 2000 manmeri i singsing na kaikai long onaim misin i stap inap 75 yia pinis. Misin i kilim 13 bulmakau na i givim planti bek rais long ol pren klostu long Madang.

Politikal Edukesen

Gavman tru bilong dispela kantri em Haus Asembli tasol. Olgeta waitman na kiap na plisman tu i mas bihainim tok na lo bilong Haus Asembli.

Haus Asembli i gat ... memba. ol i Papan na New Guinea tru. Ol pipel yet bilong olgeta 18 distrik bilong dispela kantri i vot na i makim o ilektim ol pinis. Olsem ol dispela man

o memba bilong Haus Asembli ol i sanap long maus bilong olgeta 2,500,000 manmeri bilong Papua New Guinea.

Gavman yet i makim olgeta hap graun, ol man insait long en i mas vot long wanpela memba tasol. Dispela hap graun yumi kolim ilektoret. Sapos i gat planti man long wanpela hap, bai i gat planti ilektoret, na bai i gat planti memba

bilong dispela hap. Long sampela ples i gat planti graun tasol i no gat man i stap. Kain ples olsem i no gat planti memba bikos i no gat planti pipel.

Wok bilong memba bilong Haus Asembli i wankain olsem wok bilong ol kaunsila. Ol i bringim tok na wari bilong ol pipel i kam long gavman. Memba tu i mas kam bek long ples na skulim ol pipel long ol tok na lo i kamap pinis insait long Haus Asembli. Tasol memba bilong Haus Asembli i no ken tingting tasol long liklik lain wantok bilong em. Nogat.

Em i mas tingting long mekim go het dispela kantri olgeta. Em i mas ting long olgeta lain na kain pipel bilong dispela kantri.

Haus Asembli i gat tupela bikpela wok: wokim ol lo na tilim ol mani. Ol memba i gat strong long vot na senisim ol lo bilong olgeta kain samting long teritori. Na ol yet i givim strong long ol plisman long strafim ol man i kalapim lo. Lo em i no samting bilong tambuim yumi tasol long wanpela samting, nogat. Lo em givim gutpela taim long yumi. Lo i save helpim yumi.

Wanpela samting moa: Haus Asembli i mas lukautim gut ol mani i kam long gayman. Em ol mani yumi bin kisim long Australia na ol mani gayman yet i winim long olkain takis. I no gat kaunsil takis tasol. Olgeta man i kisim gutpela pe, olsem ol tisa bilong yumi, ol i mas givim wanpela hap olsem takis. Olsem tasol man i gat mani i mas givim na bai gavman i tilim long helpim man i rabis.

Haus Asembli i save yusim dispela mani long baim ol wokman bilong gavman, long, mekim go het olkain wok long ol rot, ol skul, ol haus sik, na ol pesis. Ol samting hia i pinisim bikpela mani moa.

Orait nau oltaim yu ting long gavman, yu ting long Haus Asembli. Em yet i gavman tru bilong yumi. Haus Asembli i mas bihainim laik bilong ol pipel. Pipel yet i bosim kantri. Ol memba ol i maus bilong pipel tasol. Yu lukim: em tasol i selp-gavman Olaboi, em i stap; na yu no save.

Haus Maket

Milne Bay Lokal Gavman Kaunsil i tok orait pinis long wokim nupela maket long Alotau. Kaunsil hia i tok orait olsem long taim ol i laik mekim dispela maket, ol i mas wokim wankain olsem maket bilong Goroka Lokal Gavman Kaunsil.

SOUTH PACIFIC LAGER



OLTAIM YU TINGTING LONG BIA YU TINGTING LONG SP

YU KEN KISIM LONG OL HOTEL KLAP NA STUA

tok win poro i raitim

Tude i gat 38 kain kain natnat malaria, ol i no pret liklik long DDT na ol narapela strongpela marasin bilong pamim haus. Nogut ol i toksave long ol natnat wantok bilong New Guinea. I gat 200 bina-tang olgeta i winim DDT pinis. Ol i strong tumas.

** ** *

Wanpela kranki pasin i kirap long ol taun. Ol manki i save sapos ol i wokabout long hap rot i gat mak mak antap long en, ol draiva i mas stapim ka bilong ol. Planti manki na kranki-man i save skrapim bel bilong ol draiva. Ol i sanap wet tasol. Ol i lukim wanpela ka i kam-ap, orait nau tasol ol i kirap wokabout isi isi na pasim ka. Ol draiva i belhat.

** ** *


Taim ol soldia bilong PIR i stap long Sauten Hailans na i traim strong na save bilong ol long ol pasin bilong pait, ol i laik pren long ol lokal pipel. Na ol i mekim olsem wanem? Ol i grisim ol? Nogat. Ol i go katim pajawut bilong helpim ol.

** ** *

Olsem wanem na gavman i mekim planti toksave bilong en long tok inglis tasol? Inap nau ol man i save tok pisin i winim ol man i save tok inglis. Sapos toksave i no kamap, em i asua bilong gavman tasol. Long

WANTOK - Trinde, Septemba 1, - Pes 12


Saun bilong SANYO gutpela tumas



Sanyo i ken mekim yu makim draipela redio, stat long 8 transista i go kamap draipela samting tru em inap long kisim stesin long we. **Wonem kain samting yu laikem long harim, Sanyo i gat.**

Soim istap antap emi piksa bilong 11XA853. Emi namba wan 10 transista redio bilong harim tok long olgeta graun. Long han rait emi 8 transista redio ino hevi na isi gutpela redio em bai klia saun sapos yu kisim long we stesin.

**LUKIM SANYO
ISTAP LONG STUA
LONG HAP BILONG YU**



BRECKWOLDT & CO. (N.G.) PTY. LTD.

Port Moresby,
Box 1549,
Boroko.

Madang,
Box 185.

Lae,
Box 557.

Rabaul,
Box 222.

Mt Hagen,
Box 237.

Wewak,
Box 178.

Kieta,
Box 72

kain pasin olsem em i lusim nating taim na wok na mani.

** ** *

Australia i tok em i laik bringim moa lokal pipel insait long ol wok bilong gavman. Sapos em i tru, bilong wanem long baset bilong dispela yia ol i bin makim \$7,000,000 (seven milion dola) moa i go long pe bilong ol waitman i stap long gavman?


** ** *

Long Papua i gat tri-pela redio stesin bilong

gavman: long Kerema, long Daru, na long Milne Bay. Bihain long tenpela yia samting, ol i no bin kisim yet wanpela pas i kam long tok motu. Ol pas i kam long tok pisin o tok inglis tasol.

** ** *

Long Umboi Ailan klōstu long Finschhafen ol man i lusim \$50,000 (fifti tausen dola) long wanpela yia long baim bia tasol. Lokal Gavman Kaunsil bilong ol i no inap bungim \$30,000 takismani bilong mekim olkain wok bilong en.



**NATIONAL DAY
13th SEPTEMBER**



world news

6 killed in escape

California:- Three guards and three convicts were killed at San Quentin prison in the bloodiest attempted escape in California's history.

Three other guards were taken to hospital with knife wounds to the throat and neck.

air fare rise

Air fares throughout Australia and Papua New-Guinea will rise by 6.5% this week.

This is the third increase since August 1


last year. Counting this present increase, fares have risen by a total of 15.5%.

Air fares have risen because the Australian Budget which was released recently has set up the cost of airline fuel. Therefore the airlines have to raise fares to pay for the fuel.

new president

La Paz:- Colonel Hugo Banzer was proclaimed president of Bolivia, a small country in South America.

Reports say that at least 60 people had been killed and more than 250 wounded in fighting following the removal of former president Juan Torres.



An unusual arrival at Heathrow Airport in London recently was ORCA the killer whale. Orca is introduced to his new surroundings in the Royal Windsor Safari Park by four brave divers.

\$163 m. spent in defence

Canberra:- Australia's six years of fighting in the Vietnam War has cost \$163 million with 473 soldiers being killed the Minister for Defence Mr. Fairbairn said recently.

Mr. Fairbairn said that the national service scheme which trains boys to become soldiers had cost the Australian government about \$348 million since it began in 1965.



Ringo, one of the lions at Windsor Safari Park in England was suffering from sore feet. The chief game warden at the park found out that the problem was three ingrowing toenails and he called in the vet. Ringo had to be drugged before the operation but if this had happened in the wilds Ringo wouldn't have been able to hunt properly and might have died.

NATIONAL PORTABLE RADIOS




THE NAME IS **NATIONAL**

NATIONAL is the best radio you can buy. **NATIONAL** is

the best value

for money.



ASK FOR NATIONAL


AT YOUR NEAREST STORE.

THE NAME IS **NATIONAL**

Burns Philp (N.G.) Ltd.

for service and real value.

Sem Nating Long Wanem?



Yumi ol New Guinean i gat olkain wari na olkain hevi long planti samting nabaut. Tasol planti taim tumas yumi no save autim ol tingting tru bilong yumi bai ol waitman i ken save. Nogat. Yumi save haitim ol tingting tru bilong yumi na yumi save sindaun tasol na sarap i stap. Tasol long bel bilong yumi, olaman, yumi kros tru. Yumi save belhat.

Ol wantok, nating em i mobeta sapos yumi ken pinisim kwiktam dispela kranki pasin bilong yumi. Sapos yumi gat ol wanem kain tingting o wari, orait yumi no ken seksek. Yumi mas autim. Yumi no ken pret long ol waitman. Ol i olsem yumi yet, longtaim tru yumi lukim ol pinis. Ol i no narapela kain bai yumi mas pret long ol na oltaim "yesa, yesa" nating. God i no bin makim ol long bosim yumi. Sapos yumi oltaim "yesa" long ol bai yumi pulim ol planti draipela trabel moa i kam long yumi. Yumi i no olsem hap plang na ol ston samting. Nogat. Yumi man.

Ol dispela kranki pasin i gat as bilong en. Sapos yumi save gut long ol dispela as, orait, nating yumi no ken pret nating long ol na yumi no ken wari moa. Nogat Sampela as em hia:

1) Yumi ol man bilong New Guinea yumi ol man bilong gutpasin tru. Yumi no laik long mekim trabel. Yumi no laik semim wampela man o meri. Yumi no laik bai yumi yet i sem. Yumi save isi isi long ol man. Bilong wanem? Yumi laik abrusim ol

kain kain trabel. Ol dispela pasin bilong yumi i gutpela.

Tasol ol gutpasin bilong ol waitman i narapela kain olgeta. Ol i i no save isi isi. Nogat tru. Na olsem taim yumi save toktok wantaim ol, orait, ol i bihainim ol gutpasin bilong ol yet na hariapim toktok na autim wan tu ol tingting

bilong ol. Tasol yumi save bihainim ol gutpasin bilong bipo na isi isi long ol. Olsem na yumi lus. Ol i save kirapim yumi, daunim yumi na olsem yumi save lus.

Olsem yumi no ken isi tu yumi mas autim ol tingting bilong yumi.


2) Longtaim moa ol waitman i bin stap long dispela kantri bilong yumi na longtaim moa ol i bin bosim yumi nabaut. Ol yet i bin lainim yumi long "yesa" long ol.

Planti taim sapos yumi no bin "yesa" long ol, olaman, ol sampela i bin krosim yumi, kikim yumi, paitim yumi, kalabusim yumi na ol sampela i bin sutim indai yumi. Olsem yumi save pret yet long ol. Long ol samting olsem yumi bin lain pinis long "yesa" long ol. Tasol nau i gat nupela taim i laik kamap na i gat wampela lo tasol bilong ol waitskin na ol blakskin wantaim. Olsem yumi no ken pret moa. Nogat. Yumi mas tokaut.

Ol wantok, mi kolim pinis ol sampela tingting bilong yumi. Mi autim pinis ol as tingting bilong yumi yet bai yumi ken save gut long ol dispela na taim yumi tingting gut long ol dispela samting, orait yumi no ken wari moa.



Kopral J. Kauisa i save moa long kuk. Em i stap kuk insait long haus kaikai bilong ol saiden long Murray Berek long Port Moresby.



Ol soldia bilong Papua New Guinea i wok bung wantaim long sanapim wampela pos. Em i gutpela pasin tru.

Kaunsil Dias

Morobe

Huon Lokal Gavman Kaunsil long Lae i bin baim 25 redio long ol viles.

Presiden bilong Huon Lokal Gavman Kaunsil, Mr. famu Rapup, i tok ol dispela redio i bilong helpim ol pipel long sampela viles long harim redio Morobe.

As bilong em i olsem. Bai ol pipel i ken harim na save long wanem samting gavman na lokal gavman kaunsil i mekim long helpim ol pipel long Papua New Guinea.

Huon Lokal Gavman Kaunsil i ting long baim sampela moa redio long ol viles long hap bilong em.

Daru

Long Paoua tupela lokal gavman kaunsil i no laikim pasin bilong tul-tul luluai. Gogodala na Kiunga lokal gavman kaunsil tupela i tok olsem ol kaunsila yet ol i ken bosim na lukautim olgeta kain wok long ples. Morehead lokal gavman kaunsil i laikim pasin bilong bipo.

Port Moresby

Namba wan kiap bilong ol lokal gavman kaunsil Mr. K.R. Williamson, i tok olsem gavman i baim pinis sampela nupela namba bilong ol lokal gavman kaunsil. Inap nau ol kaunsila ol i putim namba bilong Kwin, namba bilong Australia na 4-pela leta bilong kantri bilong yumi. Long nupela namba bilong ol kaunsil

bai i gat P.N.G. i makim Papua New Guinea pisin kumul, na kundu wantaim spia. Mr. Williamson i tok tu olsem gavman i baim 1,000 namba pinis long Australia.

Romoiana

Long wik i go pinis long Duk ov Yok Ailan ol i bin mekim namba wan miting bilong nupela Romoiana Lokal Gavman Kaunsil.

Long dispela taim yet 7-pela ples olgeta ol i bin vot long mekim dispela nupela kaunsil i kamap. Em hia nem bilong ol dispela ples, Molot, Maren, Palpal, Maulim, Butlivuan, Kababiai na Mioko.

Lokal Gavman Ofisa, Mr. Liddle i tok olsem em i bin amamas tru long olgeta man bilong dispela ailan long wanem nau tasol ol i kisim kaunsil bilong ol yet. Ol pipel yet ol i laikim dispela samting na askim ol bosman long mekim dispela samting i kamap. Mipela i lukim dispela hap pinis na mipela i tingting olsem i no gat wanpela tok olsem bilong wanem bai i no gat wanpela kaunsil i ken kamap long ol ailan, na tu mekim gut na stretim olgeta kain wok bilong kaunsil.

Lae

Insait long las miting bilong Lae Taun Kaunsil sampela kaunsila ol i bin toktok long wok bilong ol bas na ol P.M.V. ka long hap bilong Lae. Ol kaunsila ol i tok olsem ol P.M.V.ka i no mas stapim wok bilong Bas

sevis. Miting hia i tok wanpela komiti i mas kamap long lukautim olgeta wok bilong P.M.V. Tasol dispela kaunsil i tingting olsem dispela komiti em bipo i glasim wok bilong ranim Bas Sevis yet i mas lukautim dispela nupela bisnis.

Westen Hailans

Wanpela lain i bungim moa long \$4,000 dola long baim bek wanpela man ol i bin kilim samting olsem 50 yia bipo. Nem bilong em Kumbatimk Puprumme, bilong lain Wallia. Ol i no save husat i bin kilim em.

Olsem nau lain Gule i givim dispela mani i go long lain Wallia long stretim indai bilong dispela man.

Memba bilong Gule, kaunsila Nori bilong Dei Kaunsil i tok; ol pipel bilong em i hepi long

givim dispela mani long Wallia pipel. Olsem ol i laik mekim indai ol trabel bilong bipo, na ol pipel i ken stap gut na bihainim lo.

Komiti bilong Dei Kaunsil, Mr. Korei i bin kisim dispela mani long nem bilong ol Wallia pipel. Na lain bilong em i amamas long kisim dispela mani.

Ol Wallia pipel i baim nau wanpela nupela trak long dispela mani.

TAA na ANSETT i karim 184,756 pasindia long ol balus bilong ol insait long Niugini long yia 1968.

KLASIFAIT

PABLIK NOTIS

BUK PREA. Yu laikim buk long beten long nait? Salim pas long Booklet, Box 1096, Boroko. Kisim nating.

Wantok Publications, P.O. Box 298, Wewak, i wokim, na Wirui Pres long Wewak i prinim.

KRISTEN PRES i wokim kain kain buk bilong strongim bilip na bilong sanapim gutpela pasin na sindaun na bel isi bilong ol manmeri na ol pikinini.

Nau yu ken baim 4-pela "Arch Book" long tok Pisin:

**Pis I Kisim Jona
God I Helpim Daniel
Haus Antap Long Ston
King Em I Singaut**


4-pela Baibel stori bilong ol pikinini.
Ol papamama i laikim ol tu.

Salim oda i go long:



KRISTEN PRES

Sales Division
The Christian Book Centre
Box 222, Madang



WANTOK
Sampok i Niug Teri kam Pe' ni

Sapos yu laik kisim niuspepa WANTOK yu mas salim dispela hap niuspepa i kam bek wantaim \$4 (foa dola).
Adres bilong mipela em hia:
WANTOK PUBLICATIONS INC.,
P.O. BOX 298, WEWAK.

NEM BILONG YU HIA:

ADRES BILONG YU HIA:

FOA DOLA

sapos yu salim \$4 (foa dola)
bai mipela i salim WANTOK
long yu inap long

WAN YIA

Sori, mipela i mas apim prais bikos ol i apim prais bilong salim ol pas.

6-pela taim.....1.00	18 taim.....3.00
12-pela taim.....2.00	24 taim.....4.00



FOA MANI LONG WOKMAN

As Asembli i bin orait long ol 1,000 wokman bilong lain i mas salim moa pe. Long yia 1971 ol i kisim \$11.80 long foatnait pas ol i wok mani stret. Bihain i pe i go antap moa yet.

U tu ol man o ofisa i pinisim long gavman i mas kisim moa malolo o pe lip. Man i mas gat krikmas o wok wantaim gavman map 35 yia bilong kisim pe lip.

Gavman tu i strong ol bisnisman mas skulim moa Niuginian long masin bilong ranim bisnis na kisim bisnis bilong ol yet.



Sta Toua Kapena, ministerial memba long bosim ol wok i toktok wantaim mipela wokman long ti faktori long distrik long Hailans

Ista Neason Paulias, hetman bilong ligela skul long Is Sepik Distrik, i kisim sertifikat long tisa Michael neke bilong Aitape.

19,841 Pinisim Standat 6
Pop i Kam Lukim

